

Nwàk nè Pol à Còm Fa TAITÒS

Taitòs à ka ñwàè Jus yen. Mvè'nè yi à bùuñ krètèn fana yi tēsə Pol bə fàak sè nà' à sə gù lòo sə. Pol à còm fa ñwàk ènə bohòyi nga yi sə cu mvwe' lak Krit. Pol nòñsə Taitòs nə mvwe' lak Krit anə ya nà'a sə jəñ ñkərè bə fàha sə mvmvwe' cos nè fo' nə.

Ñwàk nə tse' bum tē' sè ñgòcèp bə zen. Nè mò'fis də nà' sə fa Taitòs ntíp bə nsàp ncu nè aco bùu sè mantombi mɔ cos sə cum mɔtsətsə'rèə bùu lak Krit, sə wo wē' nə ye mɔp. Ntíp nə ba nè yi sə fa Taitòs nə də nà'a riñ yusə ñgòyərə bòop bùu sə zəzok mɔ cos sə. Ntíp nə tē' nə də krètèn wèñ tse' ñgòye lē fùè, nə sə ye bohòbwìñ pwe' sè' bəbòñ. Wo kà liñ ñwè nəmòk bup to, nə kà də wo sə kuəm sè' duk.

¹ Còm ñwàk nè'e mùu Pol nè mɔ ñgà fàk Nwì nə ye ñgà ntum Jisòs Krest. Krest nə a cokfis mɔ də ya mɔ tēsə bùu sè Nwì a cokfis yà'wèñ sə, ya nga wo fa ntum awo bohòyi, nə ye sè' də ya wo riñ wesə zìnə nè nà'a gùgè ñwè ñgòwəp Nwì bə ntum nè mò'fis nə.

² Mvè'nè mù sə fàk bohòyi fana mù sə naan tu ñgòkè tse' lùñ nè nà'a nè kà mè nə. Nwì ànə kak bwìñ ñjamòk lañ də yi nè fa bwìñ lùñ ànə. Yi kà mvwès cì'gè.

³ Mvèk nə à wès fana yi fis vè lùñ nə. Yi à fis nì fa bwìñ nà' bə ncèp nè yi a fa ndzə bohòmù

nə. Yà'a yusè yà' a gùu ηkuη mù sə tsòho fa bwìη ncèp ènə ηga a duk mɛ vɛ'nə Nwì nè yi ηgà lùηsè ves nə.

⁴ Mù sə còm fa ηwàk nè'e wùu Taitòs. Wu co mo àm nè zìnə bùusè vesù tse' dzədzəm nè mò'fis. Mù lɛη Nwì nè yi TÈ' àvès bə Jisòs Krɛst nè yi ηgà lùηsè ves nə də wo gɛ wu bəboη, nə fa wu fifi.

Fàak Sè Taitòs Tse' NgòGù Mɛ Coòs Sè Mvwe' Lak Krit

⁵ Njo nè mà ànə me'rə nonşə wu mvwe' lak Krit à ye də ya wu gùhɛ tsə'rə bum sè yà' ka mɛ cos anə mvè'nə yeη yà'a. Mok ye sè' də ya wu cok nonşə lo bù ηkwàha bùu sè mɛmvwe' cos nè mvwe' buk lak nè fòpwe'. Sə tsəm tse' də mù à duk wu də,

⁶ ηwè nè wu cokfis yi də nè'e ηwè nè mantombi fana ηga yi ηwè nè bwìη rì yi də yi ηwè nè yi tse' zìnə, nə tse' megu ηwàηwè mò'fis. Bwe ye tse' ηgòye bwe sè wo dzəm bohòJisòs Krɛst fana kùugì awo ye nsàp nè kaco bwìη duk fa wo də wo ηgà lohòntu' yeη, nə kà gùgutu sè' ye.

⁷ ηwè nè yi mantombi co tu mɛ cos, nə sə fàk yà'sə fàak Nwì fana ye də kùugì ye nə ye nsàp nè bwìη riη yi də yi ηwè nè yi tse' zìnə. Yi kà ni' sə nɛ, nə kà bum nènàk sə jòk. Yi kà rùk lələ dzəm, nə kà ηgà lùlù ye, nə kà mbàm lələ dzəm.

⁸ Yi ye lɛ nsàp ηwè nè yi dzəmgè də bwìη vè nda'à yi, nə sə dzəm yusè yà'a bəboη. Yi ye ηwè nè yi tse' ηkərè, nə sə gɛ yusè yà'a kəkərè. Yi ye ηwè nè yi sə fàk bohòNwì bə ntəm mò'fis, nə ye ηwè nè yi kogè ni'.

⁹ Yi nè ye tsoon nsàp ñwè nè yi sè kotse' bum sè vès à yè'rè fa wen sè cùk, ya nga yi tip rin bùu mok wèn bə ncèp nè rərən sè', ya yi niŋtsok fa to bùu sè wo sè fenə yi wèn də yà'wèen bə jòn.

Pol Duk Də Taitòs Sa'rə Ngàa Gətu

¹⁰ Gəgəuŋ tu bwìn cu wùrin, nè kà nsàp nè co wo sè yè'rè də bwìn kom tsoon tu mbəmbam yà'a ye wesè. Wo sè cèp ncèp ləm, nè sè borə bùu mok wèn.

¹¹ Gù wo nga wo lok cùu awo sə, bùusè wo sə yè'rè fa bwìn bum sè yà' ka zen yen, də ya wo tse' megu mbəm bə zen. Yà'a yu marè'tu. Wo sə bərə màk bwìn bə ndap awo pwe' bə nsàp ncèep awo yà'sə.

¹² Ñwè nəmòk nè yi la'à wo fa'nə, nè yi tsòhogè bum sè yà' ka ntòye nè, a duk də, <<Bùu lak Krit wèen ngàa cì' mvwès, də yà'wèen co nàamngòn, nè ye ngàa wè', nè sə dzəm megu ngòzə bum cùdak.>>

¹³ Yusè yi à cèp sè yà'a zìnə. Ye də wù tse' ngòcèp sa'rə wo gəgəuŋ, ya wo dzəm megu yusè yà'a zìnə sə.

¹⁴ Kà də wo sə yu'rə ngàam sè ngwàŋ sè bùu Jus wèn sè tsòho ke' yà'a nè ye bə lùuk sè bùu sè wo a bwì fa zìnə nè ñkwèn laŋ wèn a gù yà'a duk.

¹⁵ Ñwèe ye-a ñwè nè ntəm rərən, ye də bum pwe' nè ye bohòyi sè' rərən. Ñwè nè ntəm nje a bup laŋ, nè də yi ka dzədzəm tse' fana yumok ka bohòyi rərən yen. A vè'nə bùusè ñkərèə awo bə tsətsərèə awo pwe' a bup wes laŋ.

¹⁶ Wo sè jəŋ ni' awo co bùu sè wo rì Nwì, nè sè gu bum sè yà' sè niŋtsè' də wo bèn Nwì nè. Wo yà'sè bùu sè bup, nè ye gəgutu, kaco wo gu yumok sè yà'a bəboŋ yeŋ.

2

Pol Tsè' Fa Taitòs Yusè Nà'a Yə'rə Fa Bwìŋ

¹ Bohòwù yòfana wu yə'rə fa bwìŋ ncu nè nà'a kəkərè bùu bum Nwì sè zìnə sè.

² Tsok fa bù ñkwàha bwìŋ wèn də wo jəŋ bum pwe' fùè, wo ye nsàp nè co bwìŋ wəp to wo, fana wo sè tse' tu sè'. Wo dzəmtse' bohòKrest nè bə nsàp nè bəboŋ, wo sè dzəm bwìŋ, nè təəŋ gəgəŋ sè' nsàp nè bəboŋ ànə.

³ Tsok fa bàa ñkwàha bwìŋ wèn də wo sè gu bum co bùu sè wo rì Nwì. Wo kà bwìŋ sè yò, nè kà rùk sè no jàhù. Wo sè yə'rə fa bwìŋ yusè yà'a bəboŋ,

⁴ ya ŋga wo tip riŋ bwi wàhanŋwèn wèn ŋgòdzəm ndum awo, nè dzəm bwe awo sè'.

⁵ Wo yə'rə wo sè' ŋgòtse' ñkərè, nè ye ŋgòye zìnə bohòndum awo sè rərəŋ, nè kotse' riŋ ndap awo bəboŋ. Wo ye bəboŋ, nè sè yuk ndum awo ya ŋga ŋwèe kà mandzè mòk ŋgòcèp yumok sè bup bə ncèp nè Nwì nè bùu wo tse'.

⁶ Tsok fa bwe wàhanzùm wèn də wo jəŋ ñkərè bə ni' awo.

⁷ Yusè wù sè gù yà' sè' pwe'fo', wù gu yà' bə nsàp mandzè nè co wo sè ye jəŋ fàak bəboŋ sè bohòwù. Bum sè wù sè yə'rə fa bwìŋ fana wù yə'rə yà' bə zìnə, nè kà jap ñàhà.

⁸ A sə tesə kè cùhu wù anə ncèep sè bəboŋ sè kaco ŋwè cepto yumok sè bəp bə zen yeŋ. A ye ve'nə ya ŋga marè'tu ko bùu sè wo sə bēŋ yusè vesùwèŋ sə yə'rə sə, bùusè wo ka yumok sè bəp ŋgòcèp bə liŋ avès sə tse'.

⁹ Tsok fa bùu sè wo cu ŋkwèŋ wèŋ pwe' də wo sə yuk masàa awo sə, nə sə gù co masàa awo sə sə kwa bohòwo bə yusè wo sə gù sə lònŋ. Wo kà duk sə fi',

¹⁰ nə kà bo sə sòhò. Wo sə fak le bə mandzè nè aco bwìŋ naaŋ tu bohòwo, ya ŋga bwìŋ yə yusè wo sə gù sə fana wo kwasə ncèp nè a sə tsòho nà' bə liŋ Nwì nè yi ŋgà lùŋsè ves nə.

¹¹ Ja'a yòo mvè'nè Nwì a nìtsè' bòvəm nè nje nə də ya ndàaŋwè pwe' tse' lùŋ-è.

¹² A gù bòvəm ye nə ŋkuŋ vesùwèŋ rì ŋga'a də a me'rə bum sè yà' ka bə mandzè Nwì yeŋ, nə ye bum sè yà' sə bòvesùwèŋ sə nze fəeŋ sə. Ya vesùwèeŋ cum le ncu nè bə ŋkərè, nè nà'a rərəŋ mvè'nè Nwì dzəm də a cum sə nzeŋgòn fəeŋ sə.

¹³ Vesùwèeŋ cum ve'nə, nə sə tək nùmbu nè ghaŋ nè a sə naaŋ tu bə zen nə, ghà nè Jisòs Krest nè nìtsè' fa bwìŋ nàaŋ ye sə. Yi Jisòs Krest nə, yi Nwì avès nè ghaŋ, nə ye sè' ŋgà lùŋsè ves.

¹⁴ Yi à fa yòŋsè ye bùu tu avès də ya yi fiŋ me'rə fis vesùwèŋ bohòbup. A ye sè' də ya yi gù ves ŋgòye bùu sè bə ntəm rərəŋ, ya a fa ntəm ŋgògù mègù yusè yà'a bəboŋ.

¹⁵ Tsòho fa bwìŋ bum yà'sə. Cèp bohòwo bə ŋgì nè co ŋwè nè wo a fa yi nàŋ ŋgòcèp, nə tip

wo ya ntuum awo boŋ, nə jwa sa'rə wo sè', ηwèè
kà wu co yusè wà jə.

3

Ntip Bə Ncu Krətəŋ Mutsətsə'rəə Bùu Mok Wèŋ

¹ Sə tsoho malì fa bwìŋ də wo sə jəŋ ni' awo sə
nze bohòŋkwàha bùu sè wo tse' lak sə wo. Wo
sə wəp yà'wèŋ, nə sə fuhù ηgògù nsàp fàk nè
fòpwe' nè nà'a bèboŋ.

² Wo kà liŋ ηwè nəmòk bup to, nə kà də wo sə
kuəm sè' duk. Wo ye le fùè, nə sə ye bohòbwìŋ
pwe' sè' bèboŋ.

³ Wèŋ riŋ də vesùwèŋ ànə ye to yàvès sè'
ləm, vesùwèŋ kà duk sə yuk, nə sə jam mandzè.
Vesùwèŋ à ye co ηkwèŋ bohòbum sè yà' à sə
bòves sə. Ntuum avès à rwiŋ mègù ca bə bup, a
sə waŋ bum bwìŋ, bwìŋ sə beŋ ves fana vesùwèŋ
sə beŋ mòk bə mòk.

⁴ Anə kə dzeŋ nga'a ghà nè Nwì nè yi nga
lùŋsè ves nè à nìtsè' fa ves bòvəm nè nje bə
dzədzəm nè nje nə fana,

⁵ yi luŋsə vesùwèŋ. Yi ànə ka vesùwèŋ də
bùusè a gù yumok sè yà'a bèboŋ luŋsə, ànə ye
bùu koksəmanziŋ nè nje nə. Fana yi cuk reŋsə
ntuum avès, nə fa ves lùŋ nè fi, nə gù ves bə
Yòŋsè nè Rəreŋ nə ηgòye mok bùu sè fi.

⁶ Yi à kè' sès fa ves yòŋsè ye nə ve'ε cèbùè. Yi
fa ves nà' ve'nə ndzə bohòJisòs Krəst nè yi nga
lùŋsè ves nè.

⁷ Yi ànə gu vɛ'nə ya ŋga vesùwèŋ ye kəkùrè bùu bòvəm nè nje nə, ya vesùwèŋ nə kə tse' lùŋ nè nà'a nè kà mè, nè a sə naaŋ tu fo' nə.

⁸ Ncèp ènə ncèp nè zìnə co a naaŋ tu fo'. Mù dzəm də wu sə cep mali bə bum yè'sə guguŋ, nə kà teŋsè, ya bùu sè wo à dzəm bohòNwì yà'a wèŋ sə tsərə nùumbu pwe' ŋgògù yusè yà'a bèboŋ. Yà'a ye kəkùrè nə tse' swe' bohòbwìŋ pwe'.

⁹ Fana wù kà də wu sə fi'duk bə bum sè yà'a bum ləm sə duk. Kà də wu sə fi'duk bə nzak ŋgàam sè ŋgòta bə liŋ tàcici wèŋ sè njamòk duk, nə kà sə kùəm, nə kà mamfenè bə lùuk bùu Jus wèŋ sè' gù. Nsàap bum yà'sə ka fàk tse', kaco yà' jəŋ lo ŋwè mantombì yeŋ.

¹⁰ A ye-a ŋga ŋwè nəmòk fenə wu bə bum sè wù sə yə'rə fa bwìŋ sə fana wù tip to yi nè kè' mò'fis, nə tip yi nè ba. A ye-a ŋga yi ka sè yuk fana wù co'rə fis bo ndzə ni'ì yi.

¹¹ Riŋtse' də nsàp ŋkərə ŋwè ànə tətəŋ. Yi yà'sə ŋgà gù bup, yi bupsə tu ye laŋ.

Ncèp Nè NgòLèsə Lòo

¹² Ghà nè mɔ tum fa-a wu Atimàs kè Tikikòs də yi kə cum fo' àlɛ' wù caŋ və kə tseŋ mɔ mvwe' lak Nìkàpolis, bùusè mɔ nə cum fo' tètè mbàŋ ta ŋkuŋ.

¹³ Jihi nzòn guguŋ ŋgòtesə Zenàs ŋgà sak nzak bə Àpolòmchè'nè wo nə sə gi sə, ya wo kà yumok jamè.

¹⁴ Gù bùu avès ya wo riŋ ŋgògù bèboŋ, ya wo tesə ni' awo, nə sə tesə bùu mok wèŋ sè'. Kà də wo sə casə bupsə mvək wà duk.

15 Bùu sè vesi wèṅ cu fεεṅ pwe' cèpsə wu bèboṅ. Cèpsə bùu sè wo sə dzəm ves bùusè də wo a fa ntəm awo bohòKrest yà'a. Bèbo nè Nwì nè ye bohòwèṅ lònṅ.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022

c475d5b3-da44-51cf-93ca-f255b72fe481